



*Jumat, 25 November 2022*  
**Ogen: Jakobus 3:1-2**



"Si Ngajari"



**J**emaat mula-mula ngergaken ras mehamat man pengajar-pengajar paksa si e. Erkiteken arah pengajar e perpulungen melala ndatken pemeteah kerna kegeluhen, norma-norma/nilai-nilai nandangi perdalanan geluh, pengajaren kerna hukum, pengajaren kerna budaya bage pe pengajaren kerna hubungan sada ras sidebanna. Sue ras pendahinna, maka sekalak pengajar ndalanken tugas ras tanggungjawab si mbelin dengen mberat. Sekalak pengajar la saja ertanggungjawab nandangi kai siiajarkenna tapi pe arus ngasup nggeluh bagi kai siniiajarkenna ras teridah arah cerminen kegeluhenna.

Gundari pengajar-pengajar e sigelari guru ras dosen. Pendeta pe banci ikataken sekalak pengajar si mabai perpulungen erpemeteh ras erpengankan kerna si mehuli. Adi Guru isuankenna karakter si mehuli man anak muridna, ibabaina anak-anak e erlajar alu disiplin, mehamat man kalak si tuan asangken ia. Ibabaina anak e meteh bersih ras sehat, bage pe ipetandakenna kai si lit i bas doni enda, gelah anak e lit wawasenna si mehuli.

Tanggal 25 november e me hari guru. Meriah si akap sabap guru-guru ndatken pengergan si mehuli bas negara enda. Moria GBKP pe melala si berprofesi sebagai guru; sinehken pengajaren man anak didikna. Bujur kal anak-anak e pe mereken pengergan man guruna si enggo mabai ia erpemeteh dengen pentar.

Guru igelari selaku pahlawan tanpa jasa. Pahlawan si labo pernah gelarna iukir alu tinta emas, pahlawan si mereken dirina, waktuna rikut pe ras pemeteahna gelah lit perubahen si mehuli i bas diri anak didikna. Man kerina ibu guru ras pengajar subuk i sekolah, i gereja ras i bas masyarakat, tetap semangat maba pencerahen si mehuli man kerina anak didik. La lit rugina nehken ras ngelakoken pengajaren si mehuli.